



REPUBLIKA E KOSOVËS / REPUBLIKA KOSOVA

GJYKATA THEMELORE FERIZAJ

Numri i lëndës: 2024:304381

Datë: 02.12.2024

Numri i dokumentit: 06532600

**NË EMËR TË POPULLIT**

**GJYKATA THEMELORE NË FERIZAJ - Departamenti i Përgjithshëm, divizioni penal,** me gjyqtarin e vetëm gjykues Dardan Maloku, në çështjen penale ndaj të pandehurit M.R, me vendbanim në Rr. "R.M" fshati D..., komuna F..., për shkak të veprës penale Posedimi i paautorizuar i narkotikëve, substancave psikotrope ose analoge nga neni 269 paragrafi 1 të Kodit Nr. 06/L-074 Penal të Republikës së Kosovës (tani e tutje KPRK-së), sipas Aktakuzës të paraqitur nga Prokuroria Themelore në Ferizaj – Departamenti i Përgjithshëm, PP/II.nr.1717/2024 të datës 29.10.2024, pas mbajtjes së shqyrtimit fillestar, të hapur për publikun, i cili është mbajtur më datë 22.11.2024, në të cilin morën pjesë prokurori i shtetit Egzon Jakupi prokuror në Prokurorinë Themelore në Ferizaj dhe i pandehuri M.R pas pranimit të fajësisë nga ana e të pandehurit, më datë 22.11.2024 mori dhe publikisht shpalli, kurse më datë 02.12.2024 përpiloi këtë:

**A K T G J Y K I M**

**I pandehuri:**

**M.R,** nga i ati F... dhe e ëma Z... e gjinisë H..., i lindur më ....., në F..., me vendbanim në Rr. "R.M" fshati D..., komuna F..., me numër personal ....., i martuar, baba i dy fëmijëve të mitur, me profesion armirues, ka të kryer shkollën fillore, me gjendje të mesme ekonomike, shqiptar, shtetas i Republikës së Kosovës, recidivist.

**Ë S H T Ë F A J T O R**

**Sepse:**

Me datë 08.10.2024, rreth orës 16:20, në Ferizaj, rruga "S.T.", i pandehuri pa autorizim ka poseduar substanca apo preparate, të cilat me ligj janë shpallur si narkotikë, në atë mënyre që gjatë patrollimit nga zyrtarët policor gjatë kontrollit tek i njëjti janë gjetur dhe sekuestruar një

sasi e substancës narkotike e llojit marihuanë dhe një pako me rizlla. Substanca narkotike pas ekzaminimit ka rezultuar të jetë në peshë të përgjithshme prej 0.36 gram.

- Me këtë ka kryer veprën penale **Posedimi i paautorizuar i narkotikëve, substancave psikotrope ose analoge** nga neni 269 paragrafi 1 të KPRK-së.

Andaj gjykata në bazë të neneve 4, 7, 8, 17, 21, 38, 42, 43, 44, 69, 70, dhe 269 paragrafi 1 dhe 3 të KPRK-së, si dhe neneve 364, 452 dhe 455 paragrafi 1 të Kodit të Procedurës Penale (KPP-së), të pandehurin e:

### **G J Y K O N**

- I. Dënim me gjobë në shumën prej 100 (njëqind) euro dhe dënim me burgim në kohëzgjatje prej 90 (nëntëdhjetë ditëve) i cili me pëlqimin e të pandehurit i është zëvendësuar në dënim me gjobë në shumën prej 600 (gjashtëqind) euro, andaj obligohet i pandehuri që në total ta paguaj dënimin me gjobë në shumë prej 700 (shtatëqind) euro, brenda afatit prej 90 (nëntëdhjetë) ditësh pas plotfuqishmërisë së këtij aktgjykimi.
- II. Nëse i pandehuri nuk mundet apo nuk dëshiron ta paguajë dënimin me gjobë, të njëjtit në pajtim me nenin 43 paragrafi 3 të KPRK-së, dënimi me gjobë do të zëvendësohet me dënim me burgim, ashtu që për 20 (njëzetë) euro gjobë të papaguara, i pandehuri do të vuajë 1 (një) ditë burgim.
- III. Në bazë të nenit 269 paragrafi 3 të KPRK-s, **KONFISKOHET** substanca narkotike e sekuestruar e llojit “Marihuanë” me peshë të përgjithshme 0.36 gram dhe një pako me rizlla.
- IV. Obligohet i pandehuri në emër të shpenzimeve të paushallit gjyqësor të paguaj shumën prej 20 (njëzet) euro si dhe për fondin e kompensimit të viktimave të dhunës shumën prej 20 (njëzet) euro, brenda afatit prej 30 (tridhjetë) ditëve nga dita e plotfuqishmërisë së këtij aktgjykimi.

### **A R S Y E T I M**

### **1.Rrjedha e çështjes**

Prokuroria Themelore në Ferizaj - Departamenti i Përgjithshëm më datë 29.10.2024, ka ngritur aktakuzën PP.II.nr.1717/2024, kundër të pandehurit M.R për shkak të veprës penale Posedimi i paautorizuar i narkotikëve, substancave psikotrope ose analoge nga neni 269 paragrafi 1 të KPRK-së.

Me datë 22.11.2024, pranë kësaj gjykate është mbajtur seanca e shqyrtimit fillestar në të cilën ishin prezent prokurori i shtetit Egzon Jakupi dhe i pandehuri M.R.

Në këtë seancë pas leximit të aktakuzës nga ana e prokurorit të shtetit, i pandehuri ka deklaruar se e ka kuptuar në tërësi aktakuzën dhe veprën penale për të cilën akuzohet dhe se e pranon fajësinë për kryerjen e veprës penale e cila i vihet në barrë andaj gjykata pas dëgjimit të palëve dhe në pajtim me nenin 242 paragrafi 2 dhe 6 të KPP-së, ka marrë aktvendim me të cilin ka aprovuar pranimin e fajësinë nga ana e të pandehurit.

### **2.Vlerësimi i pranimi të fajësisë**

Gjykata pas mbajtjes së shqyrtimit fillestar në të cilin kanë qenë prezentë palët e lartcekura dhe pas dëgjimit të palëve ka marrë aktvendim me të cilin ka aprovuar pranimin e fajësisë nga ana e të pandehurit për veprën penale për të cilën akuzohet ngase ka konstatuar se janë plotësuar gjitha kushtet ligjore të cilat kërkohen me nenin 242 paragrafi 2 të KPP-së dhe se pranimi i fajësisë nga ana e të pandehurit nuk është kundërshtuar nga ana e palëve të cilat ishin prezentë.

Në këtë aspekt gjykata ka konstatuar se i pandehuri e ka kuptuar drejtë natyrën dhe pasojat e pranimi të fajësisë, se pranimi i fajësisë është bërë vullnetarisht nga ana e të pandehurit dhe i njëjti nuk ka qenë i detyruar ose i shtrënguar në asnjë mënyrë që të pranojë fajësinë. Pranimi i fajësisë mbështetet në faktet e çështjes të cilat i përmban aktakuza siç janë: deklarata e të pandehurit M.R e dhënë para hetuesve policor me datë 08.10.2024, vërtetimi mbi sekuestrim e përkohshëm të sendeve me datë 08.10.2024, Raporti i testit fushor i përpiluar nga Drejtoria për Hetimin e Trafikimit me Narkotikë i datës 10.10.2024, raporti i oficerit i datës 08.10.2024, foto-dokumentacioni, Ekstrakti mbi dënimet penale me numër E1/1436/2024/DEQP/KGJK si dhe shkresat e tjera që gjenden në lëndë, po ashtu me rastin e pranimi të fajësisë nga ana e të pandehurit gjykata gjeti se aktakuza lëndore nuk përmban asnjë shkelje të qartë ligjore ose gabime faktike.

### **3.Gjendja faktike e vërtetuar**

Duke u bazuar në të lartcekurat, gjykata vërtetoi këtë gjendje faktike: se i pandehuri M.R, ka kryer veprën penale Posedimi i paautorizuar i narkotikëve, substancave psikotrope ose analoge nga neni 269 paragrafi 1 të KPRK-së, në kohën, vendin dhe mënyrën e përshkruar si në dispozitiv të këtij aktgjykimi.

#### **4. Rrethanat që janë marrë për bazë me rastin e shqiptimit të dënimit**

Gjykata me rastin e matjes së dënimit ka vlerësuar që të pandehurit ti shqiptohet dënim me gjobë në shumën prej 100 (njëqind) euro dhe dënim me burgim në kohëzgjatje prej 90 (nëntëdhjetë ditëve) i cili me pëlqimin e të pandehurit i është zëvendësuar në dënim me gjobë në shumën prej 600 (gjashtëqind) euro, dhe është obliguar i pandehuri që në total ta paguaj dënimin me gjobë në shumë prej 700 (shtatëqind) euro, brenda afatit prej 90 (nëntëdhjetë) ditësh pas plotfuqishmërisë së këtij aktgjykimi, ngase duke i marrë parasysh të gjitha rrethanat dhe provat të cilat gjinden në shkresat e lëndës, ky dënim do të jetë i drejtë, në harmoni me peshën e veprës penale dhe përgjegjësinë penale të kryesit dhe si i tillë me këtë dënim mund të arrihen qëllimet e dënimit në kuptim të nenit 38 të KPRK-ës. Gjithashtu gjykata me rastin e matjes së dënimit ka marrë për bazë edhe rrethanat që ndikojnë në llojin dhe lartësinë e dënimit duke u bazuar në nenet 69 dhe 70 të KPRK-së, ashtu që rrethanë lehtësuese për të pandehurin ka marrë: pranimin e fajësisë në shqyrtim fillestar, faktin se i njëjti është penduar për veprën penale që e ka kryer dhe ka kërkuar falje publike, është mbajtës i familjes, baba i dy fëmijëve të mitur si dhe premtimin e tij që në të ardhmen nuk do të kryej vepra të tilla dhe as vepra të tjera penale, kurse rrethanë rënduese gjykata ka marrë shkallën e lartë të dashjes si dhe faktin se i njëjti është përsëritës i veprave penale dhe atë i shpallur fajtor dhe dënuar me aktgjykimin e Gjykatës Themelore në Ferizaj me numër P.367/2007 i plotfuqishëm me datë 30.11.2009; i shpallur fajtor dhe dënuar me aktgjykimin e Gjykatës Themelore në Ferizaj me numër P.676/2007 i plotfuqishëm me datë 18.12.2009, i shpallur fajtor dhe dënuar me aktgjykimin e Gjykatës Themelore në Ferizaj me numër P.212/2009 i plotfuqishëm me datë 04.04.2010; i shpallur fajtor dhe dënuar me aktgjykimin e Gjykatës Themelore në Ferizaj me numër P.245/2008 i plotfuqishëm me datë 18.04.2011; i shpallur fajtor dhe dënuar me aktgjykimin e Gjykatës Themelore në Ferizaj me numër P.887/2009 i plotfuqishëm me datë 15.02.2012; i shpallur fajtor dhe dënuar me aktgjykimin e Gjykatës Themelore në Ferizaj me numër PKR.23/2013 i plotfuqishëm me datë 09.01.2015; i shpallur fajtor dhe dënuar me aktgjykimin e Gjykatës Themelore në Ferizaj me numër PKR.67/2015 i plotfuqishëm me datë 30.07.2015; i shpallur fajtor dhe dënuar me aktgjykimin e Gjykatës Themelore në Ferizaj me numër P.1307/2014 i plotfuqishëm me datë 07.07.2016; i shpallur fajtor dhe dënuar me aktgjykimin e

Gjykatës Themelore në Ferizaj me numër P.931/2014 i plotfuqishëm me datë 08.07.2016; i shpallur fajtor dhe dënuar me aktgjykimin e Gjykatës Themelore në Ferizaj me numër P.132/2017 i plotfuqishëm me datë 27.04.2017; i shpallur fajtor dhe dënuar me aktgjykimin e Gjykatës Themelore në Ferizaj me numër P.887/2017 i plotfuqishëm me datë 19.11.2017.

Me rastin e marrjes së vendimit për shqiptimin e dënimit gjykata pati parasysh të gjitha rrethanat lehtësuese dhe rënduese të lartcekura, si dhe duke u bazuar në nenin 44 të KPRK-së i cili përcakton se: “Kur gjykata shqipton dënimin me burgim deri në gjashtë (6) muaj, gjykata njëkohësisht mund të vendosë që dënimi me burgim të zëvendësohet me dënim me gjobë, me pëlqimin e personit të dënuar. Kur dënimi me burgim zëvendësohet me dënimin me gjobë, gjykata nuk kufizohet me shkallën e përlllogaritjes të përcaktuar në nenin 43 paragrafi 3”, gjykata vendosi që dënimin me burgim në kohëzgjatje prej 90 (nëntëdhjetë ditëve) me pëlqimin e të pandehurit i është zëvendësuar në dënim me gjobë në shumën prej 600 (gjashtëqind) euro.

Andaj, duke u bazuar në të lartcekurat gjykata konsideron se me dënimin e shqiptuar ndaj të pandehurit mund të arrihen qëllimet e dënimit të parapara në nenin 38 të KPRK-së e që konsistojnë në parandalimin e kryesit nga kryerja e veprave penale në të ardhmen dhe të bëjë rehabilitimin e tij, të parandalojë personat e tjerë nga kryerja e veprave penale, të bëjë kompensimin e viktimave ose të komunitetit për humbjet ose dëmet e shkaktuara nga vepra penale dhe të shprehë gjykimin shoqëror për veprën penale, ngritjen e moralit dhe forcimin e detyrimit për respektimin e ligjit.

#### **5. Vendimi lidhur më konfiskimin e substancës narkotike**

Neni 269 paragrafi 3 i KPRK-së përcakton shprehimisht se: “Substancat narkotike, substancat psikotrope ose substancat analoge konfiskohen”. Andaj, duke u bazuar në këtë dispozitë ligjore u vendos si në pikën III të dispozitivit të këtij aktgjykimi.

#### **6. Vendimi mbi shpenzimet e procedurës penale**

Duke pasur parasysh natyrën e kësaj çështje penale dhe gjendjen financiare të pandehurit, gjykata duke u bazuar në nenin 452 paragrafi 1 të KPP-së, ka vendosur që ta detyrojë të pandehurin që të paguaj paushallin gjyqësor në shumën prej 20 (njëzet) euro, si dhe duke u bazuar në nenin 36 paragrafi 3 nën paragrafi 3.1 të ligjit Nr. 08/L-109, për Kompensimin e Viktimave të Krimit shumën prej 20 (njëzet) Euro.

Andaj duke u bazuar në të lartcekura gjykata vendosi si në dispozitiv të këtij aktgjykimi.

**GJYKATA THEMELORE NË FERIZAJ**  
**Departamenti i Përgjithshëm – Divizioni Penal**  
**2024:304382, me datë 02.12.2024**

**Gjyqtari i vetëm gjykues,**  
Dardan Maloku

**KËSHILLA JURIDIKE:** Kundër këtij aktgjykimi mund të paraqitet ankesë në Gjykatën e Apelit në Prishtinë, në afat prej 30 (tridhjetë) ditëve nga dita e pranimet të të njëjtit. Ankesa në kopje të mjaftueshme i paraqitet Gjykatës Themelore në Ferizaj.